

Համար էր որ թերևս շինած է Վաղարշակերտ, ուր միջոց մի մնայ և այս տօնի վերայ հսկէ, որպէս զի իւր ներկայութեամբ յարգանք գտնէ ընդհանուր Հայոց ուխտատեղին, վասն որոյ և Չամչեան պատմագիրներէ առնելով կը հաստատէ «Այս Վաղարշ թագաւոր բաց ի բազմազիմի շինութեանց և գործոց կարգեաց ևս տօն աշխարհախումբ ժողովրդոց իսկզբան տարւոյն Հայոց յառաջնումն աւուր ամենանն Մաւսարդի ի պատիւ Արամազդայ հօր չաստուածոց ի գերեզման հօրեղբօր իւրոյ Մաժանայ քրմապետի բաղնացն աւանի որ և կոչի Բագաւան և զիցն աւան ի Բագրևանդ գաւառի, ուր շինեալ էր հօր իւրոյ Տիրբանայ վերջնոյ Բագինս, որոյ փոխան յետոյ կարգեցաւ ի Հայս տօն Յովհաննու Կարապետի և Աթանազիսեայ վկայի: Շինեաց անդ Վաղարշ նաև զայլ տեղի բնակութեան և զարգարեաց զերկիրն յորմէ և . . . Բաղրևանդայ կոչեցաւ ևս և Վաղարշակերտ, որ այժմ Ալաշկերտ ասի»:

Այժմեան Թօփրազ-գալէի աւերակներն, ջրուղիներն և աւանդութիւնը ևս ցոյց կը տան որ աշխարհաշէն մեծ մարդու գործ է, և է բուն Վաղարշակերտն, որ ժողովուրդն բուն իսկ աւանին Ալաշկերտ կասէ շատ անգամ: Այժմեան աւերակաց բեկորներն ցոյց կտան որ մօտաւորապէս 10,000 տուն շինութիւն եղած է:

Բերդէս $\frac{1}{2}$ ժամ արևելեան հիւսիս, $\frac{1}{2}$ ժամ յարևմուտս մինչև Խանուժի աղբիւրն աւերակաց կոյտեր և հետքեր յայտնի կերևին: Խանուժի աղբիւրի մօտ սակաւ ինչ բարձրութեան մի վերայ մեծ շինութիւններու աւերակներ կան «Անրրներ» անուամբ, որ ըստ աւանդութեան ի հնումն քաղաքիս ամբարանոցն եղած է: